

HÒRTA SHÒRT SIN KONSEKUENSIA?

Enfermedat venérikò no ta kos pa hasi wega kuné! Apesar di antibiòtika potente ku médikonan tin na nan disposishon awendia, tòg enfermedatnan venérikò ta kousa mas daño di largu plaso, mas infertilidat, i mas embaraso den kanal di ovario ku nunca. Tòg tantu hende ta hunga e wega peligroso di sèks fuera di matrimonio keriendo ku nan si por hunga e wega i logra gana tambe! Talbes nan ta pensa “enfermedatnan venérikò ta algu ku *otro* hende ta haña, ma ami nò!” Ma pa miones di hende ku a hunga e wega aki, nan ta deskubrí muchu lat ku nan a pèrdè.

Te ainda, tantu hende ta usa tur klase di ekskusa, argumento, i rasonamentu pa konvensé nan mes i nan potensial partner seksual atraktivo ku nan si por gosa sèks sin sufri e konsekuensianan teribel. Laga nos nota algun argumento popular i evaluá si nan tin rason.

NOS KOMUNIDAT TA PROTEHÁ

“Nos komunidad ta protehá kontra enfermedat venérikò dor ku dòkter ta kontrolá prostitutanán.”

E kabayero ku ta pensa asina, keriendo ku e no por kontagiá un enfermedat venérikò serka un prostituta ta hopi kiboká. Nos a ser informá ku na Boneiru e médiko responsabel ta chèk prostitutanán regularmente pa sífilis i gonorea, ma e no ta hasi un tèst pa klamidia. Motibu pa esaki ta pasobra e tèst di klamidia ta mas kompliká. E mester manda e tèst na laboratorio di Kòrsou, i por dura vários siman pa haña e resultado. Ya kaba e prostituta ku ta bishitá nos isla bandoná nos pid'i baranka.

Ademas, ta un echu ku prostitutanán estranhero ku ta yega nos isla den wikent sa praktiká nan ofishi baho pa vários dia promé ku nan mester bishitá dòkter djaluna. Durante e dianan ei, fásilmente e por pega diferente kabayero ku un òf mas enfermedat venérikò.

Tampoko nos no mester lubidá ku algun hende muhé lokal tambe ta hasi e trabou desonrado di prostituta, i no ta kontrolá manera esnan ku ta bin dj'afó.

Sin duda e kontrol di parti di dòkter ta nesario i ta yuda. Pero e no por garantisá protekshon. Asta si e kontròl médiko por a sigurá nos komunidad ku ningun prostituta por pega un di nos yunan ku un enfermedat venérikò, esei no ta protehá e prostituta di e echu ku un di su “klientenan” por peg'é ku un enfermedat. Komo resultado, e prostituta por pega hopi “kliente” promé ku su próksimo chèkéo.

En realidat, ningun komunidad ta protehá kontra enfermedatnan venérikò djis pasobra un dòkter ta kontrolá e prostitutanán bibando den e lokalidat ei.

MI AMANTE TA SPESIAL

“Mi amante ta eduká, tin bon puesto; e ta muchu sabí i muchu amabel pa pegámi ku un

enfermedat horibel asina.”

Ta importante pa kòrda ku kualke pèrsona por kontagiá su partner seksual ku un enfermedat venérikò dor di relashon seksual si e mes ta infektá. No ta importá si e partner seksual ta un parlamentario òf peon, dòkter òf deportista, komersiante òf kliente, abogado òf asesino, prostituta òf pastor. Si e ta infektá, e por pegábo! No ta importá kon dushi, amabel, kariñoso, atraktivo, bunita, òf deseábel bo partner ta. Si e tin un enfermedat venérikò, bo por hañé di dje! No ta importá kon bunita e ta papia, kuantu e ta sigurábo ku e ta un birgen, ku e nunca a yega di "hasi sèks" ku un otro pèrsona, ku abo so ta su úniko amor. No ta importá kon bon bo ta laba despues di e akto seksual òf kuantu tino bo ta paga na higiene. Echu ta, si bo partner a kontagiá un òf otro enfermedat venérikò, bo ta riska di ser infektá ku e mésun enfermedat dor di tene relashon seksual kun'é.

MI AMANTE TIN SIGUR KU E NO TA INFEKTÁ

“Mi amante ta sigurámi ku e no tin un enfermedat venérikò.”

E palabranan ei por dunábo un sintimentu di siguridat. Ma e por ta siguridat falsu.

Tin dos motibu ku e argumento aki ta peligroso. E promé motibu ta pasobra bo partner seksual por tin un enfermedat venérikò sin sa. Aproximadamente 70% di hende ku tin un enfermedat venérikò no sa ku nan a ser infektá. Un estudio klásiko hasí pa Shapiro i Lentz na aña 1967 a indiká ku 85% di esnan ku tabata infektá ku gonorea, no tabatin síntoma. Un estudio di K.H. Jacek, reportá den *Canadian Family Physician* di òktober 1985 a revelá ku 75% di e muhénan infektá ku klamidia no tabatin síntoma.^{T1} For di momentu di infekshon, e pèrsona infektá ku e víro HIV por kontagiá otro partner seksual. Esaki por sosodé pa lunanan i asta añanan sin ku e mes sa ku e ta un portadó. Ta méskos ku sífilis i herpes.

Un hende por ta konvensé ku e no ta infektá ku un enfermedat venérikò; e no ta sinti ningun síntoma. Ma ta posíbel ku e mésun pèrsona aki ku ta parse asina kariñoso, asina dushi, asina presioso ta karga un víro ku por matábo! Djis pasobra bo partner ta sigur ku e no infektá, esei no ta sufisiente garantia pa protehábo di kontagiá un malesa teribel for di dje!

E di dos motibu ku bo amante su afirmashon ku e ta liber di infekshon no ta un garantia kontra un enfermedat venérikò, ta pasobra e por gañábo, e por tin bèrgwensa òf miedu di bisábo, òf no ta kere ku ta nesesario pa divulgá e informashon ei. Pues, e por sa ku e tin un enfermedat venérikò keda sin bisábo.

Kisas bo yònkuman ta pensa ku no ta nesesario pa bisábo di e frètnan na su pénis. Hopi hòmbèr no ta eksperensíá síntomanan severo di nan malesa venérikò. Komo resultado, nan tin ménos miedu di e enfermedat ku nan tin di ser rechasá pa e beyesa ku ken nan ke gosa sèks. P'esei nan no ta bisa e mucha muhé nada. Esei no ta amor. Esei ta egoismo.

Un otro faktor ku ta hunga un ròl hopi importante den esaki ta e echu ku hopi hende ta gaña tokante nan enkuentronan seksual. Un estudio di 422 studiante di universidat ku tabata seksualmente aktivo a haña ku hopi di nan a atmití ku nan a yega di gaña tokante sèks. Kuarenta i shete porshento di e hòmbèrnan i 42% di e muhénan a laga sa ku nan a yega di gaña tokante kuantu partner seksual nan tabatin den pasado. Tambe 42% di e kabayeronan i 33% di e damanan a deklará ku nan lo no bisa nan partner si nan a hasi sèks ku un pèrsona un biaha so. Ademas, 23% di e sekso maskulino i 10% di e sekso femenino a bisa ku nan lo no laga nan partner sa si nan tin un otro partner seksual aktualmente.^{T2} Ta notabel ku hopi hende a yega di eksperensíá un impusibilidat: kontagiá un enfermedat venérikò for di un "birgen"!

Ta un echu ku un hende ku ke gosa sèks ku bo, no ta un hende ku bo por konfia pa ta kompletamente onesto tokante su aventuranan seksual den pasado. No pensa ku si bo ta entrevist'é tokante su pasado seksual promé ku boso ta subi kama, ku esei lo protehábo!

Si bo ta bai kasa ku un pèrsona ku a yega di tene relashon seksual ku un otro pèrsona den pasado, ta bon pa e laga dòkter kontrolá si e ta infektá. Awendia e probabilidadat ta grandi ku el a kontagiá un enfermedat venérikó, maske e tabatin solamente ún otro partner seksual. Ta rekomendabel pa e laga dòkter hasi tèst pa sinku enfermedat: sífilis, gonorea, klamidia, hepatitis (dehel) B, i AIDS. Si e tin sífilis, gonorea, òf klamidia, tin tratamentu pa eseinan. Si e tin hepatitis B, e pèrsona salú por haña un vakuna kontra esei. Si e ta un portadó di e víro HIV, bo por buska bo propio morto dor di kasa ku e persona aki. Bo mester disidí si bo ta dispuesto di kasa kun'é.

Si bo tin un enfermedat venérikó, ta sumamente inhustu pa skonde e echu ei di bo partner seksual. Mihó lag'é sa *promé* ku boso ta tene relashon seksual. Pa gaña òf keda sin bis'é ta egoismo. Ora bo ta bisa bo partner, bo tin ku dun'é oportunitat pa e disidí kiku e ke hasi. Kisas lo e ke posponé tur kontakto seksual te ora ku bo a hasi un tèst pa enfermedatnan venérikó. Ta pusibel ku bo ta portadó di un otro enfermedat venérikó sin sa.

Si bo ta tene relashon seksual sin revelá e echu ku bo ta infektá ku un enfermedat venérikó, bo por ta responsabel pa e infekshon di hopi hende. Tin evidensia ku un solo portadó, indirèkt a kousa infekshon di 200 hende.^{^T3^T}

UN AVENTURA SO NO TA PELIGROSO

“Sigur un solo enkuentro seksual lo no eksponé mi na un enfermedat venérikó peligroso ku por afektá mi salú.”

Maske kon rasonabel e idea aki ta zona, e no ta kuadra ku realidat. Ta un echu bon probá ku kualke pèrsona por kontagiá kualke enfermedat venérikó dor di solamente un enkuentro seksual!

Si bo tin relashon seksual ku un pèrsona ku a yega di "hasi sèks" anteriormente, i e no a laga dòkter hasi un tèst pa mira si e ta un portadó di un òf otro enfermedat venérikó, den un sintido bo no ta drumi ku bo amante so. Bo tambe tabatin seks ku tur su partnernan anterior.

Un ehèmpel lo ilustrá esaki bon kla. Un mucha muhé a kere e tabata seif pasobra e tabatin sèks ku su frei so. El a keda strañá ora su dòkter a inform'é ku el a kontagiá un enfermedat venérikó. Kon esei por ta? Un investigashon a revelá ku e frei di e mucha muhé tabatin relashon seksual ku solamente un otro muhé. Ma e muhé ei a yega di drumi ku sinku otro hòMBER. E sinku hòMBERNAN tabatin sèks ku 19 muhé, i algun di nan tabata prostituta. Ora e konteo a kaba, a bin sali na kla ku e mucha muhé ku a kere ku su relashon seksual tabata limitá na un pèrsona so, di bèrdat, dor di e un pèrsona, e tabatin kontakto ku por lo ménos 92 otro hende.

Ta konosí tambe ku e promé dama ku a muri di AIDS na Fransia tabatin sèks ún biaha so...ku un portadó di e víro HIV. Dr. Joe McIlhany a konta di un dama di 50 aña ku a bin serka dje pa un konsulta. E tabata divorsiá. E tabatin un bon amigu. Despues di konosé e amigu aki pa vários aña, nan a tene relashon seksual un biaha so. Ma dor di e un enkuentro seksual, el a kontagiá herpes. Awor, kada luna e ta sinti kimamentu severo komo resultado di solamente un aventura seksual...

E pensamentu ku bo por probechá un biaha so i skapa ta peligroso! Ningun garantia kontra infekshon ta eksistí! Asta si bo partner no ta sinti síntomanan di un òf otro enfermedat venérikó, e por ta infektá sin sa. Pa probechá un biaha so por kambia e restu di bo bida...i asta por hibábo na bo graf!

Ta bon pa realisá tambe ku segun Dr. Edward Weismeier, direktor di Sentro di Salubridat pa studiantenan di universidat UCLA, ku solamente un enkuentro seksual, un pèrsona salú por

kontagiá *sinku diferente* enfermedat venérikó!^4 Den otro palabra, si bo ta hasi sèks ku un pèrsona ku ta infektá ku sinku diferente enfermedat venérikó, bo por kontagiá tur sinku dor di drumi kun'é un biaha so!

Klaramente, un solo enkuentro seksual por ta peligroso!

MI TA HASI SÈKS KU UN PERSONA SO

“Relashon ku un partner seksual so sigur lo protehá mi di enfermedat venérikó.”

E pensamentu di e persona aki ta ku e mester keda fiel na su partner i su partner mester ekskluí tur otro amante, esta un relashon monógamo. Esei di bèrdat ta un fórmula pa evitá enfermedat venérikó.

Ma tin un problema grandi ku e konsepto aki. Fuera di matrimonio, mayoria amestat intimo asina no ta dura mas ku algun luna. Pa e argumento aki tin valides, fieldat mutual ta nesario pa durashon di añanan. Un pèrsona por kontagiá un enfermedat venérikó promé ku el a drenta e relashon eksklusivo. E enfermedat por keda skondí pa añanan promé ku e ta realisá ku e ta un portadó

Tambe sa sosodé ku maske un partner ta ekskluí tur otro amante, e otro partner si ta kòrta orea kuchi kuchi. E fieldat mutual ta bira algu di un banda so.

Dr. Sandra Samuels, direktora di Servisionan di Salú pa Studentenan na Universidat Rutgers, a hasi un estudio pa ku klamidia. El a haña ku 33,3% di e studentenan femenino i 37,7% di e hòmbènan tabata infektá. Ora el a puntra tokante nan práktikanan seksual el a bin haña sa ku 62,7% di e muhénan a deklará ku nan tin un relashon monógamo di mas ku seis luna. Ma 53% di e studentenan maskulino a atmití ku nan tabatin vários amestat ku a inkluí sèks.^T5^T

Un supuesto relashon mutualmente monógamo no ta garantisá ku bo no por ser infektá ku un òf mas enfermedat venérikó!

NOS TA USA KONDOM

“Ma nos ta usa kondom. Esei ta garantisá ‘safe-sex!’”

Kondom, e salbabida moderno, lo ta e tópiko di e próksimo kapítulo.